

Den Elan an den Asazwëlle behalen

Usprouch vum Här Generalvikar Leo Wagener

Här President, Här Minister, Dir
Dammen an Hären Députéiert,
léif Eieregäscht, sehr geehrter Herr
Dr. Binswanger, léif Membere vun
de Jongbaueren a Jongwënzer,

Gëschter Owend war ech an enger
Séance académique vun enger
Chorale, déi hiren 100.
Grënnungsjubiläum gefeiert huet an
do huet den Här Paschtouer bei
senger Ried aus enger Chronik vum
Veräin zitéiert, wou folgendes ze liese war: „Die Versammlung stand unter einem guten
Omen. Es war Wein vorrätig.“



Wann ech elo erof an dat Hënnescht vum Sall kucken, da mengen ech soen ze dierfen: „Och
dës Versammlung steet ënnert engem gudden Omen, well et ass Wäi parat; esou passt et
sech jo och fir d'Jongbaueren a Jongwënzer.

E ganz gudder Verlaf vun dësem Owend wënscht lech och den Här Äerzbëschof, dee leider haut
verhënnert ass an deen ech dofir op dëser Plaz vertrieden.

Nach haut de Mëtteg huet hie mech an engem Telefongespréich gebieden, fir lech ganz
härzlech vun him ze grëssen. „Ech hu se ganz gäer!“- esou O-Toun Bëschof. - Et ass
wierklech keng Floskel! Dir déi Jonk wësst et, de Romain weess et, datt Dir wierklech en
décke Steen am Briet vun eisem Äerzbëschof hutt an all seng Sympathie.

Ech fanne perséinlech, datt hien domat ganz richtig läit an ech felicitéieren dem Präsidium, dem
Aumônier, dem Permanent, de Leit am Sekretariat an an der ONG, de Responsabel a Membere vun
de regionale Gruppe ganz härzlech fir hiren Engagement bei der Landjugend an de Jongbaueren a
Jongwënzer.

Et ass een Engagement am Déngscht vun de jonke Leit um Land am Allgemengen, am Déngscht vun
de jonke Betribsleeder am Besonneschen an am Déngscht vun der mannerbemëttelter
Landbevëlkerung a West- an Zentralafrika.

Wann ech bewusst wollt e bëssen humorvoll ufänken, esou ass de Sujet, deen de Referent vun
dësem Owend gewielt huet, e ganz bedenkenswäerten, op dee mir mat grousser Spannung waarden:
„Globalisierung und Landwirtschaft — Mehr Wohlstand durch weniger Freihandel!
Normalerweis ass de Refrain, dee mir an dem Kader vun der Globalisierungsdebatte
héiere jo just de Konträr: Mir kréie versprach: „Méi Wuelstand duerch méi Fräihandel!“

Mir wëssen awer och, datt déi grouss Gewënner vun der Globaliséierung am Agrarsecteur eben net d'Produzente sinn, mee d'Agrarkonzerner. Verléierer sinn dacks genuch déi kleng Baueren an den Entwécklungslänner.

Ech hu mech bei dëser Problematik un dem Jean Feyder säi Buch „Mordshunger - Wer profitiert vom Elend der armen Länder?“ erënnert.

Doranner seet de fréieren Direkter vun eiser Kooperatioun (Seite 19): „*Nur dank einer Politik, die zu profitablen und stabilen Preisen führt, kann die Masse der Bauern der Verarmung entkommen. Starke Preisschwankungen hemmen jede Investitionstätigkeit. Diese Schwankungen einzuschränken setzt einen Bruch mit der neoliberalen Wirtschaftspolitik und eine Entkoppelung der Weltmärkte voraus. Neue Regeln für die Agrarmärkte müssen fragile und schwache Wettbewerber in der Landwirtschaft vor Dumping und Preisverfall absichern — insbesondere durch Schutz dieser Märkte und ein öffentliches Vermarktungssystem.*“

Ech si gespaant ze héieren, wéi den Här Binswanger sech zu dësen Zesammenhäng stellt.



Net gespaant brauch ech ze sinn, wéi dëse Jugendverband sech der Problematik vun der veraarmter Landbevëlkerung an Afrika unhëlt. Ech si mir nämlech sécher, datt d'Jongbaueren an d'Landjugend an der Traditioun vun hire Virgänger sech aktuell an zukünfteg mat grousser Determinatioun fir hir Kooperatiounsprojeten

asetzen. De grouss Succès vum *Dag vun der Kooperatioun* zu Clärref dëst Joer hott dat op en neits ënner Beweis gestallt.

Ech wëll zum Schluss en Appel un d'Vertrieder vun der Politik a vun de Verwaltungemaachen, déi mat dëse jonke Leit ze dinn hunn. Fuert w.e.gl. virun si tatkräfteg, finanziell a moralesch ze ënnerstëtzen.

Si si formidabel Beispiller vun enger Jugend, déi hir eegen Uleies an déi vu Mënschen am Misär selbstverantwortlech opgräift, déi eng sérieuse Reflexioun ustellt, déi hir knapp bemoosse Fräizäit an den Déngscht vum Land- an Agrarsecteur stellt an déi grousshärzeg Aktiounen am Sënn vun der *Hilfe zur Selbsthilfe* realiséiert.

Léif Frënn, Dir sidd wichteg! Dir sidd e jonkt Gesiicht vun der Gesellschaft a vun der Kierch an ech wënschen lech, datt Dir och weiderhin Ären Elan an Ären Asazwëlle behaalt. Hie wäert seng Friichte bréngen: heiheem an an Afrika.

Merci fir Är Opmierksamkeit.